

魏廷朝 ê

「改朝換代」

Ng 望有人koh kā kián 號名「X 廷朝」，
來 kā 中華民國「改朝換代」，hō 台灣
早日出頭天！。

林俊育／台語文工作者

讀tiòh chit 期（131期）ê《新使者》一句
「m̄ 願 kah 不義 ê 政府妥協」，hō 我想
起約 20 年前 ê 一段故事。

有一工我透早開車去台北高爾夫球場
phah 球，入球場會館 ê 時看 tiòh 一位老大人
落計程車了後帶球袋入會館，結果阮仝組作
伙 phah 球。Chit 位老大人 tiāⁿ-tiāⁿ phah OB 球
（界外球，out of bound），一位桿弟 tiòh 負
責拾4位球員 ê OB 球，有時我 tiòh 幫 chit 位老
大人拾球。雖然伊是老芋 á，人真良善 koh 真
客氣，每 pái 拾球 tng 來 hō 伊，伊 lóng 感謝不
盡，hō 我真好印象。

球 phah soah，我請伊搭我 ê 便車 tng 去台
北，伊 koh-khah 感謝不盡。一下開車伊就問
我：「你 kám 是基督徒？」我講：「你 ná 會
知？」伊講：「我是基督徒，我老大人tī 台北
球場 phah 十 gōa 年 ê 球，m̄ -bat 有球伴替我拾
球，我感覺會出你有基督 ê 疼心……」。

過無 joā 久伊就問我：「你感覺彭明敏
chit-ê 人 án 怎？」我應講：「伊是一個真好 ê
教授，我真尊敬。」伊講：「我是專門替蔣
總統（指蔣介石）來苦勸遭遇關監 ê 台獨人士
寫悔過書 ê 人，彭明敏有寫悔過書就釋放，m̄
-koh 魏廷朝 lóng m̄ 肯寫悔過書。」

我 tiām-tiām 聽，伊繼續講：「我問魏廷朝為甚麼反政府？伊應講：阮老父 kā 我號名叫做『魏廷朝』，m̄ 是『魏朝廷』，tòh 是叫我 tiòh 去『改朝換代』。我 kā 伊講：蔣總統抗日成功光復台灣 tòh 已經替你改朝換代，你 tiòh mài-koh 反政府 kám m̄ 是？。伊應講：我 chit-má iáu 是叫做『魏廷朝』，所以 tiòh 繼續改朝換代！」

老大人講伊 tng 去隨時寫「字條」去叫魏廷朝 ê 戶政事務所，kā「魏廷朝」ê 名改做「魏朝廷」，戶政事務所回覆講：「魏廷朝」chit-ê 名無符合改名 ê 條件（pháin 聽 á 是 kah 大人物全名）。

所以魏廷朝 tiòh 繼續「改朝換代」。

可惜魏廷朝早死（1999年12月28日因心肌梗塞 soah 來死亡，享年六十五歲），ng 望有人 koh kā kiáⁿ 號名「X 廷朝」，來 kā 中華民國「改朝換代」，hō 台灣早日出頭天！。



母語葡萄園有聲版，請上網收聽。
新使者雜誌：<http://newmsg.org.tw/>



大衛牙醫植牙中心

國際口腔植體學會亞太區創會會長

美國牙科植體膺復學院碩士

台北牙科植體學會創會主委

牙科植體博士 **蘇 嘉 俊**

院址：台北市林森北路112號3樓

電話：2562 9108 傳真：2567 1717